

25/04/2002

Bertanggungjawab terhadap keselamatan ahli keluarga

KEBELAKANGAN ini banyak kejadian tidak bermoral berlaku membabitkan remaja dilaporkan menerusi media, dan sesetengahnya diklasifikasikan sebagai kes jenayah. Sesetengahnya terdapat kes di mana remaja dan kanak-kanak menjadi mangsa, dan ada juga kes yang dilaporkan itu berpunca daripada remaja sendiri, termasuk dilakukan oleh pelajar sekolah.

Satu daripada jenayah yang menjadi isu hangat kebelakangan ini ialah sumbang mahram, di mana kanak-kanak dan remaja menjadi mangsa perbuatan tidak bermoral oleh ahli keluarga sendiri. Berikutan kejadian itu, mangsa terpaksa menanggung penderitaan kesan perbuatan orang yang sepatutnya melindunginya, sekali gus menyebabkan masa depannya tidak menentu.

Kini kerajaan memandang serius perkembangan ini, malah Perdana Menteri, Datuk Seri Dr Mahathir Mohamad sendiri menyifatkan mereka yang melakukan perbuatan itu sebagai manusia kejam, tidak berperikemanusiaan, dan wajar menerima hukuman berat.

Kita harap perkembangan ini turut memberi pengajaran dan iktibar kepada semua pihak khususnya golongan pelajar. Sebagai orang berpelajaran dan berpendidikan agama, kita harus menghindari perbuatan itu dan memastikan tiada sesiapa yang memperlakukan perbuatan tidak bermoral ke atas ahli keluarga sendiri. Kita harus memainkan peranan bagi mengelak kejadian seumpama itu berlaku, bukan saja ke atas ahli keluarga sendiri, malah orang lain.

Satu daripada peranan yang dapat dilakukan ialah mempunyai hubungan kekeluargaan yang erat dan mesra, serta melindungi antara satu sama lain. Misalnya sebagai abang dalam sesebuah keluarga, sepatutnya melindungi keselamatan adik-adik yang lain, dan membimbing mereka sehingga menjadi insan berguna, cemerlang dalam pelajaran, dan tidak terpengaruh dengan sebarang kegiatan tidak bermoral.

Kebanyakan kes jenayah atau sumbang mahram berlaku dalam keluarga yang pincang. Hubungan di kalangan anggota keluarga tidak mempunyai nilai kasih sayang, saling menghormati dan pertanggungjawaban. Jika sikap itu tersemat dalam jiwa masing-masing, nescaya setiap anggota keluarga pasti berasa bertanggungjawab melindungi keselamatan ahli keluarga mereka sendiri, dan bukan dengan merosakkan masa depannya.

(END)